

NCEA Te Kaupae 1 Ngā Putanga Ako o Te Ao Haka mō ngā Aromatawai

He rauemi tautoko i te Pou Tarāwaho mō te Te Ao Haka

He aha ngā Putanga Ako ā-Wāhanga Ako, me pēhea hoki taku whakamahi?

Ko tā ngā Putanga Ako ā-Wāhanga Ako he tautohu i ngā mōhiotanga me ngā pūkenga me mātua whai e ngā ākonga e rite ai rātou mō te aromatawai. Nā ngā Paerewa Paetae i ārahi ngā Putanga Ako ā-Wāhanga Ako. Me whakamahi ki te taha o ngā rauemi NCEA katoa.

Kāore ngā Putanga Ako ā-Wāhanga Ako e whakakapi i tētahi o ngā tuhinga o mua. E whai wāhi atu ana ki tēnei ngā Tautuhinga Aromatawai ā-Waho me ngā Tikanga Aromatawai. Me whakamahi i te katoa o ngā rauemi NCEA e mārāma katoa ai te tangata ki tēnā, ki tēnā o ngā here o ngā Paerewa Paetae, e whakamahere ai hoki i tētahi hōtaka tōtōpū o te whakaako, o te ako, o te aromatawai hoki. Kaua ngā Putanga Ako ā-Wāhanga Ako e whakamahia mō ngā whakataunga a te kaiaromatawai. Ko te Paerewa Paetae me ngā Taunakitanga Aromatawai mō ngā Ngohe Aromatawai ā-Roto ka whakamahia mō aua whakataunga.

Ka whakamārama ngā Putanga Ako ā-Wāhanga Ako, i te taha o ētahi atu tuhinga tāpua, ki ngā kaiako ngā mea me whai wāhi ki ā rātou hōtaka o te ako me te whakaako, me ngā pūkenga o ngā ākonga me hihira e rātou, i te aromatawai e whakatata atu ana. Ehara i te mea me ōrite te wā whakaako ki ngā Putanga Ako ā-Wāhanga Ako katoa.

Me tūhono ngā mahi akoako katoa ki ngā ao o ngā ākonga i Aotearoa me Te Moana-nui-a-Kiwa. I te nuinga o te wā, ka kōwhiri ngā kaiako, ngā ākonga rānei i ngā horopaki. Nā reira, kāore ngā horopaki e tautohua i ngā Putanga Ako ā-Wāhanga Ako i ngā wā katoa. Ka tukua pea he tauira hei whakaahua i ngā kaupapa me ngā horopaki, engari ehara i te mea me mātua whai.

E āhei ana ngā ākonga ki te whai wāhi atu ki ngā mahi whakaako e tautoko ana i a rātou ki te eke ki ngā taumata tiketike o te eke paetae. Kei te hāngai te nuinga o ngā putanga ako ki te taumata o Paetae. Heoi, kua whai wāhi hoki ngā putanga ako o ngā taumata eke paetae o runga ake.

Ko te kawatau, ka noho ngā mōhiotanga me ngā pūkenga i ngā Putanga Ako ā-Wāhanga Ako hei tūāpapa i ia Paerewa Paetae. Ka whakawhirinaki atu ngā ākonga ki aua akoranga i te wā o te aromatawai. E tika ana kia mōhio ko te aromatawai he tukanga tīpako noa, nā reira kāore e aromatawaihia ngā mea katoa ka whakaakona.

Te Paerewa Paetae 1.1 (91976): Te whakaatu māramatanga ki ētahi āhuatanga tāpua o Te Ao Haka (Ngā whiwhinga: E 6)

Ngā mea kei te aromatawaitia	Ngā Putanga Ako Whāiti
Ngā āhuatanga tāpua o Te Ao Haka	Ka mōhio te ākongā ki: - te nahenahe, ki te motuhaketanga o ngā āhuatanga tāpua ka kitea puta noa i ngā pekanga o Te Ao Haka, ahakoa kāore pea e kitea i ngā pekanga katoa i ngā wā katoa - te whakaahua me te whakaatu i te whānuitanga o ngā āhuatanga tāpua o Te Ao Haka, hei tauira: te wiri, te takahi, te pūkanga, te rere (o te poi), te tū, te reo/hāngū, te whakakai, te tūwaewae, te mahinga rākau, ngā nekehanga ā-tinana. Ka whai wāhi pea ki tērā: - te tautohu i ngā āhuatanga tāpua o Te Ao Haka me te tautuhi i ia āhuatanga me tōna pūtake, tōna tāpuatanga rānei. - te tautohu i ngā āhuatanga e motuhake ai ngā āhuatanga tāpua. Ka whai wāhi pea ki tērā: - te āhukahuka me te whakaingoa i ngā āhuatanga tāpua o Te Ao Haka, me te tohu i ngā āhuatanga e motuhake ai ia āhuatanga.
Te whakapapa o ngā āhuatanga tāpua	I ngā taumata o runga ake o te paetae, ka mōhio te ākongā ki: - te whakamārama i te whakapapa o te whānuitanga o ngā āhuatanga tāpua. Ka whai wāhi atu ki tēnei ko ngā kōrero o mua, ko te whanaketanga rānei o te whānuitanga o ngā āhuatanga tāpua, me te whai wāhi hoki o ērā ki ōna motuhaketanga. Ka whai wāhi pea ki tērā: - tētahi tūhuratanga o te takenga mai i te horopaki o ngā Atua, te taiao rānei i ahu mai ai ērā, me te whakaaweawe o ērā i ōna āhuatanga motuhake.
Ngā rerekētanga ā-iwi, ā-hapū, ā-rohe rānei i ngā āhuatanga tāpua	I ngā taumata o runga ake o te paetae, ka mōhio te ākongā ki: te matapaki i te rerekē o te whakaaturia o ngā āhuatanga tāpua, pēnei i te wiri, i te takahi, i te pūkana hoki, e tēnā, e tēnā iwi, hapū, rohe rānei.

Te Paerewa Paetae 1.2 (91977): Te whakaatu i tētahi tūmomo mai i tētahi pekanga o Te Ao Haka (Ngā whiwhinga: E 6)

Ngā mea kei te aromatawaitia	Ngā Putanga Ako Whāiti
Te whakaatu i ngā pekanga o Te Ao Haka	Ka mōhio te ākongā ki: - te tautohu i ngā pekanga o Te Ao Haka hei wehenga whakaaturanga, tae noa atu ki te mōteatea, te waiata ā-ringa, te poi, te haka, te haka wahine, te whakaeke, me te whakawātea - te whakaatu i tētahi tūmomo katoa — mai i te tīmatatanga ki te mutunga — mai i tētahi pekanga o Te Ao Haka, e whakaatu ana i ngā āhuatanga tāpua, pēnei i te wiri, i te pūkana, i te takahi hoki, mā roto i ngā nekehanga, ngā reo, me ngā kupu.
Ngā kāhua whakaaturanga o Te Ao Haka (ngā rerekētanga ā-iwi, ā-hapu, ā-rohe)	I ngā taumata o runga ake o te paetae, ka mōhio te ākongā ki: - te kawē i te kāhua o te pekanga mā roto i te whakaaturanga, tae noa atu ki ngā rerekētanga ā-iwi, ā-hapū, ā-rohe rānei. Ka whai wāhi pea ki tērā: - te whakamahia o te reo whāiti o te iwi, te hapū, te rohe rānei, me ngā rerekētanga ā-tūreo, ngā kīwaha ā-rohe, me ngā kōrero o mua - te whakaatu i ngā tū, i ngā wiri, i ngā pūkanga whāiti hoki a ngā rohe, a ngā iwi rānei. - te whakaatu i te pūmau o te aronga mō te katoa o te whakaaturanga o te pekanga i kōwhiria ai e rātou. Ka whakaaturia te aronga mā roto mai i te pūmau o te hiringa, te mārama o te reo, te tukutahi, me te rere o ngā ringaringa e whakaata ana i ngā āhuatanga tāpua o Te Ao Haka.
Ngā pūkenga whakaaturanga o Te Ao Haka	I ngā taumata o runga ake o te paetae, ka mōhio te ākongā ki: - karawhiu i tētahi whakaaturanga i tētahi pekanga o Te Ao Haka i kōwhiria ai, e kaha hoki nei tana kukume mai i te minenga. Ka whai wāhi pea ki tērā: - te karawhiu i te whakaaturanga me ōna hononga kare ā-roto, ahurea hoki, mā te kawē i te iho me te kaupapa o te tūmomo - te karawhiu i runga i te ihiihi, mā te whakamahi i ngā whakapuakanga ā-kanohi, i te reo ā-tinana, me te reo ki te whakawhiri i ngā kare ā-roto me te whāinga - te karawhiu i te whakaaturanga me te tika o ngā nekehanga, o te wā, me te mārama o te reo. - te whakatinana i te kāhua o te pekanga mā roto i te whakaaturanga.

Te Paerewa Paetae 1.3 (91978): Te whakaatu māramatanga ki ētahi wāhanga o roto i Te Ao Haka (Ngā whiwhinga: E 4)

Ngā mea kei te aromatawaitia	Ngā Putanga Ako Whāiti
Ngā pekanga me ngā wāhanga o Te Ao Haka	Ka mōhio te ākonga ki: - te tautohu me te whakaahua i ngā wāhanga o roto i tētahi pekanga o Te Ao Haka. Hei tauira: - ko ngā wāhanga pea o te mōteatea, ko te aroha, ko te tangi, ko te pao, ko te pātere, ko te karakia, ko te apakura, me te ngeri - ko ngā wāhanga pea o te waiata ā-ringa, ko te aroha, ko te poroporoaki, ko te whakahāwea, ko te whakatoi, ko te ngahau, ko te tangi, ko te whakanui, ko te whakapapa, ko te karakia, ko te pōwhiri - ko ngā wāhanga pea o te haka, ko te ngeri, ko te taparahi, ko te pōwhiri, ko te whakatū-waewae, ko te peruperu, ko te tūtū ngārehu, ko te manawawera - ko ngā wāhanga pea o te poi, ko te poi poto kotahi, ko ngā poi poto e rua, ko te poi roa kotahi, ko ngā poi roa e rua, ko ngā poi e whā - ko ngā wāhanga pea o te whakaeke me te whakawāre ka ahu mai pea i ēnei e whai nei: ngā kaupapa whānui, te whakanui, te aroha, te whakapapa. - te tautoko i te whakaahuatanga o ia wāhanga ki ētahi tauira o tētahi tūmomo i ia wāhanga. Hei tauira, i te pekanga o te poi. Tukua tētahi tauira o tētahi tūmomo o te poi poto, me tētahi tauira o tētahi tūmomo o ngā poi roa e rua.
Te horopaki me ngā āhuatanga motuhake o ngā wāhanga o Te Ao Haka	I ngā taumata o runga ake o te paetae, ka mōhio te ākonga ki: - te whakamārama i te take e taea ai ia wāhanga o Te Ao Haka te whakaaturia i tētahi horopaki ka tukuna. Ko ngā horopaki ka puta pea, ko te pōwhiri, ko te poroporoaki, ko te tangihanga, ko ngā kaupapa whānui rānei - te whakamārama i ngā āhuatanga e āhukahukatia ai ngā tauira hei wāhanga ki tērā wāhanga. Hei tauira, ko te whakamārama i ngā āhuatanga motuhake o te haka pōhiri, arā, he wāhanga nō te haka.
Ngā ōritenga me ngā rerekētanga o ngā wāhanga o Te Ao Haka	I ngā taumata o runga ake o te paetae, ka mōhio te ākonga ki: - te matapaki i ngā ōritenga me ngā rerekētanga o ngā wāhanga, ā, ka kōrerohia ia tauira. Ka whai wāhi pea ki tērā: - te matapaki i ngā āhuatanga e ōrite ana i ia wāhanga i roto i te pekanga, i ngā āhuatanga e motuhake ai ērā, me te kōrero hoki i ētahi tauira.

Te Paerewa Paetae 1.4 (91979): Te whakaatu māramatanga ki ngā huānga o roto i tētahi whakaaturanga o Te Ao Haka (Ngā whiwhinga: E 4)

Ngā mea kei te aromatawaitia	Ngā Putanga Ako Whāiti
Ngā huānga o roto i tētahi whakaaturanga o Te Ao Haka	Ka mōhio te ākonga ki: - te noho o ngā huānga hei wāhanga ki tētahi titonga, ki tētahi whakaaturanga rānei e kitea ana, engari kāore e motuhake ana, ki Te Ao Haka. Hei tauira, he wāhanga te tere, te manawataki, me te reretau i te puoro - te whakaahua i te whānuitanga o ngā huānga i tētahi whakaaturanga o Te Ao Haka, pēnei i te tere, i te manawataki, i ngā taineke, i te rangi, i te hanga, i te wāhi, i te hiringa, i te whakatau, i te reo, i te whakaahua, i te huahuatau, i te tirohanga, i te horopaki, i te oro, me te anga o te titonga. Ka whai wāhi pea ki tērā: - te āta tautohu i ia huānga - te tautuhi i ia huānga - te whakaahua i te āhua, i te whakamahia rānei i te whakaaturanga, me te kōrero hoki i ētahi tauira whāiti nō te whakaaturanga.
Te wāhi ki ngā huānga mō te whakawhiti i te tikanga i roto i tētahi whakaaturanga o Te Ao Haka	I ngā taumata o runga ake o te paetae, ka mōhio te ākonga ki: - te whakamārama i ngā whakawhitinga o ia huānga i te horopaki o te whakaaturanga. Hei tauira, ko tā te tere pōturi he whakawhiti i te takuate i te mōteatea, ā, mēnā e tere ana te tere, e whakapuakitia ana te whāwhai, tētahi haerenga rānei i tētahi pātere. Ka whai wāhi pea ki tērā: - te whakamahuki i te pūtake, i te pānga rānei o te huānga i te whakaaturanga - te whakamārama i te whai wāhi atu o te huānga ki te tikanga o te whakaaturanga, me te kōrero i ētahi tauira nō te whakaaturanga.
Te pānga o ngā huānga i roto i tētahi whakaaturanga o Te Ao Haka	I ngā taumata o runga ake o te paetae, ka mōhio te ākonga ki: - te matapaki i te mahi ngātahi o te whānuitanga o ngā huānga e puta mai ai tētahi hua i te whakaaturanga. Ka whai wāhi pea ki tērā: - te tūhura i ngā pānga i waenganui i ngā huānga rerekē o roto i te whakaaturanga - te matapaki i te pāhekoheko o ēnei huānga e puta mai ai tētahi hua i te whakaaturanga, me te kōrero i ngā tauira mai i te whakaaturanga.